



Minggu, 6 Desember 2020

Jeremia 40:7-12



Mpekena Si Tading



Selaku Gubernur Juda, Gedalya isuruh lako mpekena-kena bangsana si la ikut iangkut ku Babel. Prajurit-prajurit Juda i bas kuta-kuta si kitik la keru iangkut, banci saja erkiteken cebuni i bas ingan si terpencil. Kenca Jerusalem italuken kerajan Babel, mulihken kalak enda kerina ndahi Gedalya. Selaku Gubernur, Gedalya erjuang mperdameken rakyat Juda, emaka man prajurit-prajurit si membela Jerusalem, ikatakenna gelah ngendesken diri man kerajan Babel. Ulanai mberontak sebab Jerusalem enggo talu. Pangen sinik saja ras tading i Juda alu dame, banci pe mulihken ku kutana, tading i je lako nerusken geluhen sada bangsa. Kerina anggur ras gandum si tading i je banci ipepulungna guna ncukupi keperluan geluh rakyatna. Lit pe piga-piga kalak Jahudi si pernah kiam nadingken Jerusalem erkiteken penjajahan Babel, gundari mulihken ngendesken diri man Gedalya, sebab begina berita maka gandum ras anggur banci ipepulung man rakyat Juda. Ope lenga pengepungan Babel, rakyat Juda biasana nimpan gandum ras jelei i bas lumbung. Tapi masa pengepungan kerjan Babel, bangsa Juda dekahen pulung i Jerusalem, perjuma pe dekahen la nuan gandum seh enggo kekurangan pangan kalak Jehuda. Erkiteken sie enterem kalak kiam Jerusalem nari ndarami perlindungan man bangsa si deban. Kenca berakhir sie kerina begisa maka buah anggur mulai erbuah janah e banci ipepulung rakyat Juda meriah ukurna guna mulihken ku kuta asalna. Kerina kalak e pe ialo-alo gubernur Gedalya. Alu dem kepentaren ikekepna kalak Juda. Si musil- musil pe kerina iperdiatekenna. Tetap iberekenna kata-kata si mbangun semangat tapi ia tetap berpihak man raja Nebukadneser. Isuruhna kerina rakyatna gelah la biar-biaren ngendesken diri man raja Nebukadneser janah patuh man bana. Nina, ‘tadinglah inegri enda, erdahinlah guna raja Babilon emaka kerina jadi simehuli man bandu.’ Bageme kata-kata e si ngerehken semangat man bangsa Juda, emaka mulai me ia ngiani kutana sekalak-sekalak, merdang dingan nuan ia i juma-juma si enggo ndekah terulang. I je nari me teridah lit ulih bangsa e guna encukupi keperluan geluhna sekalak-sekalak.